



宋蔡忠惠文集卷之七

明後學吳興蔡善繼伯達甫校

律詩

仁宗皇帝挽詞 七首

道德由來太古同
生靈休養至仁中
五兵不試歸神武
萬物無私是化工
玉座忽逢春月盡
金旌遙指洛川窮
年年翠輦長陪扈
那向西城別梓宮

又

向近千秋節
何言七月期
遺恩群玉宴
往事柏宮祠

仙路雲龍會。秋風鼓角悲。萬人瞻彩仗。猶認吉行時。
又

聲教中原泰。恩仁萬國臨。憂勤符帝夢。付與得天心。
簫吹凝寒氣。雲山歛夕陰。還期千載後。歌頌莫知深。

又

儉薄留遺詔。遵行在繼承。桐棺會稽冢。瓦器孝文陵。
闕外秋螢度。林端曉月澄。須知無可欲。終古不騫崩。

又

萬世威神在。多方惠澤隆。密音通虜壤。行哭亦兒童。

畫翣離丹闕。幽堂對紫嵩。孤臣空雨泣。白首抱遺弓。

又

儉勤追禹績。恭讓體堯仁。措枉朝多直。除苛吏盡循。
遵儒恩禮異。左戚賞刑均。立子知天意。超然卽上賓。

又

攢宮開七月。隧路閉千秋。地帶三川拆。天合萬國愁。
烏雲知聖沒。龍駕想神遊。厚祿將無報。慙恩更白頭。

昭陵行

宮人上臨候。昏鐘簾外香。烟燭影紅庭。柏飛霜。陵漏

雙溪集卷之七
永可憐今夜月明中

天聖八年寄居悟空院留詩僧壁今三十五年
人事變遷存沒感懷子發遠惠新編語及曩
舊披覽數過悽惻之極輒復短章少伸慙懇
空梁詩板歲年多。唯有秋虫占作窠。聞道故人時拂
拭。此生無奈舊情何。

○ 有遺梅花枕前者因成

誰寄梅花置枕傍。前時復得枕清香。因香夢徹江南
路。江水浮天月似霜。

甲辰寒食遊公謹園池

二月名園荔鬱青。爲憐佳節此閑行。偶因觴詠心還
適。暫離塵埃眼倍明。風靜落花深一寸。日遲啼鳥度
千聲。主公高意何須道。芳物於人自有情。

四月十七日奉安

仁宗皇帝御容於景靈孝嚴殿是日舟次陳留
感懷述事十六韻

先帝傳基固真人嗣統平餘恩華夏在高詒古今傾
漢法原爲廟仙居別有京海中金闕見天上玉樓成

睿意懷丕烈宸毫薦大名孝唯將舜擬巖亦與周并
龍向朝雲起奎和晝日呈流光俄游歲發號慶重明
令節千秋過端儀萬衆迎謹呼山嶽動驅佛鬼神驚
縹緲來佳氣雍容下太清旛旌多異制歌吹自新聲
琳館初停御鑾輿始此行盥孚通至感福澤被群生
往事時兼遠孤臣淚獨橫晨興西嚮久悽斷老年情
至鑠外
旗聲不斷鼓聲催堤柳陰濃野色開今日客衣何事
爭京塵不肯出城來

洪澤阻風

今日風期惡遲迴一水濱村旗呈酒聖廟鼓賽河神
躍鯉曾驚網饑鳥不避人商工時借問何處卽通津

遊金山寺

平日厭塵土今遊興味長波濤圍四際臺殿起中央
魚聽晨餐鼓雲和夕炷香薰風休遞吹襟袂不勝涼
五月宿江陰軍葛公綽草堂

曾解征衣寄草堂枕邊泉石自生涼休論仙訣能延
壽暫得身閑夢亦長

七月過孤山勤上人院

青林藹藹日暉暉薄晚涼生暑氣微湖上清風如可
載畫船十隻不空歸

重陽日有美堂南望

越邑吳封繡錯分華堂繁吹半空聞山峰高下抽青
筍江水東西卧白雲菊蕊芬芳初應節松林照耀欲
迎矚州人不見歸時醉未擬風流待使君

韓玉汝山堂會別梅花已盛至蘇州示喻水鄉

天寒未開

遙知畫舫艤江隈寒勒梅花未得開唯有山堂紅燭
下至今繁艷傷尊壘

梨園法部更置小部音聲三十餘人帝幸驪山

楊貴妃生日命小部張樂長生殿因奏新曲
未有名會南方進荔枝因名荔枝香

傾宮晨起傳輕粧山殿生風夏日長小部新聲落天
上無人知是荔枝香

丙午年正月邀葛公綽宿杭州山堂公綽遺詩
有爲是山堂似草堂之句因以荅之

山堂爭似草堂清俗事隨人百種名賴有西窗春茗
在甌中時看白雲生

公綽示及生日以九龍泉為壽荅

多謝山人遠祝延壽杯仍是九龍泉九龍惠山別名餘生事

事無心緒直向清涼度歲年

和荅孫推官久病新起見過錢塘之什

於世無機是海翁客情醒醉任鄰鐘廉纖雨意還侵
夜料峭春期未減冬寶氣上浮南掩玉歲寒中立不
凋松若王自結英雄網千載風雲定有從

又

病來安健賦詩誇甲子新移一歲加吾道所存唯浩
氣世緣何著但空花烟雲已過同歸鴈楊柳初藏並
宿鴉便擬尋山逐幽趣春泥隨馬不須遮

和夜登有美堂

忽聞乘月上層臺正值江湖夜色開雲屋萬重燈火
合雪山千仞海潮來靜遊雖有詩情得獨笑應無俗
語陪縱使羈懷多感慨若逢情致少徘徊

和偶登安濟亭

津亭遙望草萋萋空曠清懷與物齊春水倒行潮欲
上晚雲平壓日先低高城覽古人何在遠渡傷離客
自迷好共山翁同出處不隨朝騎五門西

和江上觀潮

地卷天回出海東人間何事可爭雄千年浪說鴟夷
怒一信全疑渤海空寂靜最宜聞夜枕崢嶸須待駕
秋風尋思物理真難測隨月虧圓亦未通

和荅孫推官

擬將身計入扁舟縱得三公不黑頭病體已輕休賦
鵬機心如動輒驚鷗強看吳野江山醉肯爲春風花
草愁所向乾坤皆客寓可能於我更遲留

和古寺偃松

古寺無人野蘚滋空庭永日雪風吹橫河圓若張青
蓋老榦孤如植紫芝萬乘未輕蟠木器千年終與大
椿期須知才短爲天幸江上婆娑得所宜

和新燕

燕燕何來處處喧新從海上振輕翰卑飛不避春泥
重竝語應愁夜雨寒客舍暗窺吟筆健宴堂時見酒

雙蓮苑齋
孟乾雕梁信美多移主願爾將雛擇便安

開州園縱民遊樂 二首

風日朝來好園林雨後清遊魚知水樂蝶戲見春晴
草軟迷行迹花淡隱笑聲觀民聊自適不用管絃迎

又

節候近清明遊人已踏青插花穿戟戶酤酒向旗亭
日迴林光潤風迴海氣腥未知何處樂歸路已嚴扃

遣興

苦竹生筍四五寸櫻桃開花千萬枝空濛野色當樓

處索寞春寒帶雨時已放清歌逐瑤管旋籥新釀行
金卮衰翁酩酊自爲樂舉鞭不問并州兒

夜雨病中

久雨曾無度陽和漸向闌雜香生衆木濃翠入孤巒
漏緩霄仍靜燈微曉更寒芳時猶卧病何日出城看

寒食西湖

山前雨氣曉纔收水際風光翠欲流盡日旌旗停曲
岸滿潭鉦鼓競飛舟浮來烟島疑相就引去山禽好
自由歸騎不令歌吹歇萬枝燈燭度花樓

上巳日州園東樓

地上多於枝上花東樓凝望惜年華
潮頭正對伍員廟燕子爭歸百姓家
粉籜漸高山徑筍綠旗初展石巖
茶流芳自與人無老樽酒相逢莫重嗟

四日清明西湖

千頃平湖綠一遭空城遊樂自奢豪
畫船爭勝飛江鶻翠巘都浮載海
鼉芳草堤邊裙帶短柔柔陌上髻
鬟高樓前盡日聞歌笑不啻秋風卷怒濤

渡南澗

隱隱飛橋隔野烟石磯西畔問漁船
桃花盡日隨流水洞在清溪何處邊

入天竺山留客

山光物態弄春暉莫爲輕陰便擬歸
縱使清明無雨過入雲淡處亦霑衣

十日西湖晚歸

清晨出郭又晴曛已見空枝嫩葉新
爭得山頭能閣日且容湖上不歸春
人隨百戲波翻海酒到三橋月滿身

三橋乃西湖歸路月中飲於橋上

只有牡丹纔半折未知何處

可娛賓

十二日晚

欲尋軒檻倒清尊
江上烟雲向晚昏
須倩東風吹散
雨明朝却待入花園

十三日吉祥探花

花未全開月未圓
看花候月思依然
明知花月無情
物若使多情更可憐

十三日出趙園觀花

水際開花千萬窠
初鶯時逐麗人歌
欲知太守行春

樂只向東城得最多

十五日遊龍華淨明兩院值雨

垂楊修竹半藏山
一徑紆回暮雨間
綠滿野田看渺
渺白飛巖溜自潺潺
空村鮐背行歌去
古寺頭陀乞
食還却羨幽人在
淡僻斷無來客扣禪關

十六日會飲駱園

名園何事却居鄜
永晝游蜂乳燕喧
不計陰晴與風
雨卷簾花藹在尊前

十八日陪提刑郎中吉祥院看牡丹

節候初臨穀雨期滿天風日助芳菲生來已占妙香
國開處全烘直指衣攬照儘從烏帽重放歌須遣羽
觴飛前騶不用傳呼寵待與遊人一路歸

又往鄭園

小小園亭細細風千枝淺白間淡紅誰知狹徑無人
到畱得青春向此中

十九日奉慈親再往吉祥院看花

天意應偏與春工已盡歸來如從月下去似逐雲龍
艷絕聲名遠清多香氣微輕陰資潤澤斜照動光輝

劇飲千鍾酒相娛伍綵衣曾非重芳物庶以奉慈闈

二十二日山堂小飲和元郎中牡丹向謝之什

幾家園館見千枝白髮雖多意不衰香澤最淡風靜
處醉紅須在月明時已知佳節無餘日已過穀雨三日更向

殘芳卷一卮擬放春歸還自語來年老信莫先期

寄錢塘春遊詩呈南陽郭待制

一春遊攬足詩歌寄與南陽遠思多若憶錢塘曾到
處西湖仍是舊烟波

荅孫推官

不是窮輪始問途肯將全壁溷泥污向平婚嫁何時
畢陶令田園先自蕪羈旅且甘家四壁牢愁須藉酒
千壚唯應抒素推文富落筆詞章氣象麤

和孫推官憶徑山遊

三十年前浙右行徑山纔稱愛山情油幢雙雙絲杉
翠五山盡環珮涓涓石澗鳴遶寺極峻只疑天上黨

遙臨初覺地東傾分符不得重遊賞碣石巖邊記姓

名舊有記徑山
遊鐫碣石當

奉荅孫推官南屏舊遊

已憐叢翠在湖邊最勝濃嵐近照前未省天工能刻
飾祇應山骨自清堅巖端下溜添春澗穴底來風送
野烟欲仗何人安屐齒更尋幽徑一攀緣

和登安濟亭

亭上風吹藤帽簷爲憐清勝得安恬驚濤觸岸層瀾
碎落日銜山半景尖遙認犀奔知露角忽逢龍挂見
胡顛浙江時有龍起
鄉人謂之龍挂城南一去通滄海無限春寒向

晚添

和運使王學士舟次德清見寄

洛陽平昔誇文會君已勝冠我壯夫談道最先稱賈
誼憂時曾見哭唐衢尹師魯兄弟多同會敢將膠漆論同志幸
得湖山可共娛須向餘春迴馬足柳堤相逐踏青蕪

和運使學士芍藥篇

密葉陰沉夏景新朱欄紅藥自爲春香於蘭芷偏饒
艷畫入縑綉未逼真已恨芳華難駐景可堪愁卧動

經旬

病起同觀

三年想愛須留戀不爲江頭酒味醅

伏承躬侍安輿出遊烟霞洞拙詩奉呈運使學

士

新晴特地入烟霞道並南山轉更賒幽磬過隣溪口
寺衆鷄鳴午野人家洞深隨溜先如雨石古籠藤亂
放花潘岳小園猶作賦輕軒選勝樂無涯

寄來安孫推官

我愛孫公子安貧無所營相逢雖邂逅一見卽平生
黑電揮詩筆黃河瀉酒觥輕舟何處在別思若搖旌
段家堤西望晚山

月下西山千萬重日光山氣鬱葱籠縑綉數幅須移
得惆悵如今無畫工

孫武篇

入官無所解因咲得君憐豈知孫武子自欲逞威權

西施篇

越國無雙艷吳宮未始知誰言勾踐黠不自愛西施

唐彥猷挽詞

鯁亮馳名久孤高進路難富文平日業勸學晚年官
隧外春江靜林邊曉露溥唯應墳上土猶解長芝蘭

又

舊德推當代新悲入故鄉直當冠獬豸清可濯滄浪

美研晴煤色文甌晝茗香生平無復見流涕送幽堂

六月八日山堂試茶

湖上畫船風送客江邊紅燭夜還家今朝寂寞山堂
裏獨對炎暉看雪花

和錢端明遊南屏山

新秋初變一天清急雨仍添萬木聲山勢不根空外
起湖光無際槩來平錦衣應有徘徊戀金地聊開燕
樂情衰暮典城何所用願公雲路羽翰生

送錢端明還京

禁墀初別紫霄端故國生光里俗懽二世家聲聯將
相百年廟貌儼衣冠躬臨州戟迎門下每至州解
客次下馬人
喜曾孫夾道觀石照老苔封舊迹錦溪喬木沸清瀾
東趨越嶺興懷遠夕聽胥濤入夢寒江上馳心思魏
闕日邊歸路指長安香淡離渚花重疊涼滿行舟酒
半闌應念非才持虎契平時相繼侍金鑾

清暑堂會同年

當年綠髮上天衢三紀于今雪滿鬚榮路風波多契
濶畫堂歌吹暫懽娛杯中明月時搖動草際飛螢乍
有無莫問更籌須劇醉四翁同籍亦難俱

清暑堂中秋夜飲

江國初涼夕漏均青天無翳地無塵蓮花剪綵燈光
粲蕉葉傾金酒味新時節暗遷應不再懽娛難得莫
辭頰明年今夜中庭月依舊寒光別照人

宋蔡忠惠文集卷之八

明後學吳興蔡善繼伯達甫校

律詩

宋君輔許當世陳彥謙蘇宣甫自遠還鄉上元

同飲

故國逢君慰喜偏
清宵行醺重留連
山樓上火人初合
天漢無雲月自圓
樂色時聞花院裏
春風都在酒旗邊
莫辭徹曉須沉醉
後會還應不計年

李閣使新種洛花

雙彙齋
堂下朱欄小魏紅一枝濃艷占春風新聞洛下傳佳
種未必開時勝舊叢

園館春遊只帝京可憐衰悴海邊城縱然得酒心猶
在若也逢花眼亦生

客有至自京師言諸公春間多會於元伯園池

因念昔遊輒形篇詠

綠渠春水走潺湲畫閣高巒映碧鮮酒令已行金盞
側樂聲初急翠裙圓清遊勝事傳京下多麗新詞到
海邊曾是罇前沉醉客天涯回望重依然

秋日

城頭萼草受新霜天外孤鴻叫夕陽送客懷情楓樹
老着人襟袖菊花香

秋日登郡樓二首

秋水已復潛秋風初怒號天容霜後爭山勢北來高

又

落葉隨飛鳥踈砧砑暮蟬悠悠戍樓角凄切萬家傳

七月二十四日射弓

破的心仍在爭豪力不堪開弓初覺顛盈貫未離貪

衰病先期老中年豈分甘唯應罇酒在萬事一醺醺

七月二十四日食荔枝

絳衣仙子過中元別葉空枝去不還應是天人知憶
念再生朱實慰衰顏

中秋夕獨坐望月

萬里妻疑魄幽淡在處通清流河漢盡寒入水雲空
踰久方全白彌高適正中開書還自卷把酒復誰同
泫葉溽宵露吹衣變暑風更看庭樹影漸過粉牆東
九日許當世以詩見率登高

霜雲明爭海山隈一歲登臨始此回堂上壽觴淋浪
滿欄邊佳菊似疑開故鄉情味人人好今日榮恩節
節來正是秋風洗煩暑力將衰颯上高臺

杭州璘上人以花栽數種見寄

名園參差十數窠商船千里任風波土花分破根株
小春色隨來意氣多欲種更看移樹法將開須與倚
欄歌中年漸不勝杯酌紅翠他時奈爾何

冬溫

海曲封疆僻冬溫氣序差蟲蛇誰閉戶草木自開花

雙
霧重朝迷日風號夕卷沙可憐天地雪偏解舞京華
庚子上元卽事

老去年華只自驚又逢佳節向山城春臨半夜寒猶
重月到中天色更清上客風流連宿醉遊人歌調得
新聲遙思鳳闕行時令紅繖朱欄萬燭明

醉後

醉後歸來月滿衣重重花影帽簷欹行人路畔猶相
笑未似山翁倒接巵

朱樓

朱樓燈燭一聲歌臘後天街月色和平昔黃公酒壚
下誰知跬步邈山河

一百五日開千葉間金

西園花蘂過中春微雨初晴不受塵莫怪芳叢開發
蚤欲將紅艷送行人

庭松安靜堂

偏愛堂東砌下松三年瀟洒伴衰翁寒聲動盪潮初
上疎影孤圓月正中清徹紗帷延晝夢綠涵金盞帶
春風自緣多病饒歸思便覺山林野意通

四月池上

風下平池水暈開池邊露坐水風來草香萋萋生冷
席雲影飛飛度酒杯荷葉偶成雙翠蓋荔枝纔似小
青梅人閑物靜兩相得月色蒼涼始肯迴

嘉祐三年七月某再領泉山是歲春夏不雨祈
飛陽廟明年早詣靈嶽祠又明年五月復來
三次皆晝寢於是頻年不稔豈非郡守不德
之致乎

年年乞雨問山神太守自知才德

薄彼蒼何事罪斯民

北園登高卽事呈諸同僚

江雲寒薄不成霜九月登高菊未黃飛鏑有聲弓已
力小槽分溜酒初嘗秋容行見丹楓老客意難勝紫
陌長時被石曾是禁園風物好故鄉時節可能忘重

錫宴
外園

送馴鹿與東禪長老

二年馴擾傍山家欲領東還道路賒送汝給孤園裏
去此生長伴大牛車

畫生李維寫予像今已十年對鑑觀之因題其側

清眸綠髮十年前朴野風神不易傳今日青銅莫相照白髭垂領面雙顴

將赴京留題山莊西壁

禁林京尹荷恩光三上螭頭乞郡章貧薄奉親須仰祿此心安敢繫軒裳

燕司封同年以詩見迎

寄問閩州明使君十年蹉跎路岐分帳前約束承嚴

節

福州乃

按下文書接署雲

福州

知北去最先趨畫

戟老來應免醉紅裙新篇一覽思遊舊搔首孤吟日

又曛

題共樂亭

層巒高與赤霄通節歲歡娛衆庶同庭有美音非獨樂音會當炎暑自多風山川勝勢欄干下井徑追遊月色中私幸編民居客右使君樽酒未應空

徐虞部以龍尾石硯邀予第品仍授來使持還

書府

玉質純蒼理緻精鋒鋌都盡墨無聲相如間道還持

去肯要秦人十五城辨歛石以此法若端石則不然

過囊山寄宏師

三十年間登第初青衫羸馬叩禪居鬢毛白盡猶奔

走慚愧高人得自如

人日立春舟行寄福州燕二司封

清溪潮上送行船回望高城隔曉烟景色似看名畫

展前日君家畫醉魂猶憶壽杯傳君家世傳壽杯行之佈酒春盤食

菜思三九人日書幡誦百千南國逢君唯道舊後時

何處笑今年

又寄興化徐虞部

梅花狼藉拂輕舟人日溪行動客愁上國去程初北

首故山歸思滿東流垂垂朝雨隨雙槳草草春蔬送

一甌不獨懷鄉便多感看人難似府君侯

上元至南劍州大雨寄泉州許通判

路遠溪迴不計程行郵今復宿延平陰雲藏月不知

處急雨落天無數聲病起尚疑群蟻鬪夢餘初聽一

鷄鳴泉山去歲同遊賞惟有神君識此情

大湖驛寄建州同年賓職方

別驛臨溪曲清寒結曉陰灘聲生亂石雨意在閑林
登第年華久相逢禮愛淡茶山春物近那得共追尋
嘉祐辛丑蒙召還京二月八日道過陸氏之門

因觀小欄花卉

風色微和日晝明小欄花卉新芽生行人不是愛春
物一見芳叢似有情

題嚴先生祠堂

邊此巢由志誰希公相權人瞻祠樹古天作釣壇圓

高節千秋外遺蹤一水邊孤風敦薄俗豈是愛林泉
杭州過璘上人花園

封培剪剝奪天工欄下長年見萬紅投老暗知心力
少自開還落信春風

雪

六年守郡在天涯冬暖無因見雪華今日復看千里
白強憐寒色作詩誇

寄題華藏院清軒

湖邊無地有塵埃况復虛明向此開山色每隨朝氣

雙夔苑齋
變水光長夕共陽來船行天上遊人散樹沒雲中宿
鳥回一到便應離火宅不須花雨拂金臺

提刑司封以隣霄臺佳什垂示輒成拙篇以荅

厚貺

峭拔幾千仞孤高無四隣低回傾北斗突兀起東閩
締結青雲上登臨滄海濱溪山來面勢歌吹徹穹旻

子夜先看日陰崖得後春三韓空瑣碎

福人云高峯晴海見新羅

州萬落自埃塵使者風流在詩人格調新驪珠忽投

我神筆動驚人平昔持州契於今識路津去天知不

遠咫尺仰威神

過楊樂道宅西桃花盛開

城隈遶舍似山家舍下新桃已放花無限幽香風正
好不勝狂艷日初斜自怜馬上空愁望誰向樽前與
醉誇京國難逢春氣味莫隨塵事度年華

和龐公謝子魚荔枝

霜鱗分不登枯肆丹實全應勝木奴欲効野芹羞獻
去敢期佳什墜驪珠

宋宣獻公夫人畢氏哀詞二首

世闕推台路嬪賢秉國鈞生緣隨迹化歸處覺空真
訓子清風在傳家令德新九原終一致悲喜盡成塵

又

國賦雖千乘身期未百年箴圖遺舊机簫吹向新阡
行哭追前日超生定幾天寂寥原上樹薄晚起寒烟
和張唐公約遊名園遇雪輒止

京塵官事日區區擬出芳郊佩一壺樓外陰雲迎曉
合陌頭霏霰與風俱翩翩珍騎曾來否種種名花更
在無若得縱遊休秉燭月中沉醉倩人扶

和宋次道宴日不赴有懷

殿中佳氣帶春容天上雲謠落晚風獨向下陳霑醉
竿羨君清卧寄詩筒

春日

東風吹雨濕鞦韆紅點棠梨爛欲燃擬買芳華贈年
少紫榆春淺未成錢

唐公以公累出知濠州

湛湛清渠風力微濠梁行客布帆歸到官應過莊生
廟試問鶴鵬兩是非

桃杏園

上有繁葩下落英紅波動蕩逐風行夕陽開處猶光
艷何況今宵值月明

送客來仙館清幽處處尋春風行酒面晝日到花心
獨厭歸期促難忘野意淡歸鞍更回顧檜柏自陰森

三月出城別張唐公會玉仙觀

隴麥青青溝柳新春歸聚落少逢人如何試與持鞭
手拂却向來身上塵

玉仙池

洞府花飛不減春輕雲成片玉成塵香鞞縹緲知何
在無限池頭再拜人

凝祥池上晚歸

綠徑陰陰落景微楊花零亂上人衣長烟似愛滄波
面風色雖豪不肯飛

和楊龍圖蘆鴈屏

何事高堂秋思生野蘆寒鴈畫工精風前挺立孤根
老雲外相從去意輕不似丹青能借色若逢霜月定
聞聲研桑心術都無取回望江鄉計未成

和楊龍圖麀猿屏

畫莫難於工寫生麀猿移得上幽屏相逢平野初驚
顧共向薰風適性靈引子晝遊新草綠嘯群時望故
山青可憐官省沉迷處每到中軒頓覺醒

和吳省副北軒畫湖山之什

誰於素壁寫江流雲樹疎疎映菰洲畫日清虛全却
暑一川搖落似經秋暫逢明畫心猶在終向扁舟老
去休只有遊儵能自適莫懷香餌重遲留

送仲庶待制知澤州

十年臺省獻嘉謀新總兵符鎮上游琴有薰絃多舜
俗地連沙尾舊湘州江邊行色船千丈塞外威聲馬
萬頭宣室夜談思賈誼未應鄉國久遲留

送子真給事出守常山

安得長材護北州暫煩儒將擁輕裘聲名不啻一敵
國功業何須萬里侯設館高牙延永晝獵場飛騎入
清秋天樞巖近恩榮重歸夢應思帝所遊

送程刑部出守洪州

何事名郎出計臺鍾陵都會久須才江山不是人間

有旗鼓初從日下來列郡五符歸總制故鄉三組少
徘徊勿嗟南國多懷感寶氣還應徹斗魁

宋蔡忠惠文集卷之九

明後學吳興蔡善繼伯達甫校

箴

進黼辰箴狀

右臣伏覩詔書宣諭三館臣僚或朝廷大事邊防機
宜許令密陳章疏或乞上殿敷奏者臣竊聞 太宗
皇帝兵戎初定乃作三館購藏天下之書精選四方
之士仍於館下旁設便門或時臨幸或卽召對故當
時之得失下民之利病多所推究而施行之 真宗

皇帝屬世治平游意文藻詞臣之列嘗預詢訪於是天下之人知備官禁闈者不獨繙討蠹書亦有以通上聽而裨國治矣伏自

陛下臨御以來嚮二十餘季未嘗一至所增官屬准前數倍未嘗一召今者特布德音開誘言議茲所以見

陛下憂勤之至人人自力思竭志慮以裨萬分之一臣愚不知

陛下將以成好問之名歟直欲擇至當之言而用之也臣智識蒙陋不敢廣引古記多屬空文輒求於今要悉之務而

陛下之所欲知者謹撰成黼辰箴一首書爲兩軸每句之下條陳事實別疏一通各隨狀上進臣聞唐太宗凡言事有益於政者書之屋壁以爲警戒伏惟

陛下不以臣之狂直而棄之幸置臣箴詞於戶牖間時賜省覽原其所條事實終始則今安危之勢可見矣昔漢賈誼論及時事以謂可爲慟哭者以臣今日之心知古人之言不虛謬矣干冒宸嚴無任戰汗之

至謹具狀奏聞謹奏

箴

丕顯元聖上奉天時躋俗於禮任材以宐肅治家政
大隆本支好問益廣去邪勿遲利慙思困兵連慮危
法令必信恩賞無私威福是守聽斷不疑太平可致
夬所施爲

別疏

臣所進黼辰箴每句之下條陳事實於左

丕顯元聖上奉天時

臣愚淺不知陛下天下之造竊謂丕顯元聖上奉天
時者以天人交感之應合若符券比年以來地震日
蝕黑風災火變見之端可謂多矣臣謹按先賢所論
地震者陰迫於陽也日蝕者陰薄於陽也黑風晝冥
者陰盛於陽也災火者陰極於陽也如此之類皆陽
不勝陰之所致矣陽者君象也陰者臣下也夷狄也
婦女也今夷狄內侵則見之矣必有臣下潛弄威權
宮中多收冗列故上天再三警戒欲陛下思而革之
轉災爲福也臣聞太祖撥五代之亂太宗平定

天下 真宗思與百姓休息至於建立經久之業變
更非便之制將有待於陛下也陛下專政以來執議
之臣謂天下已安循襲舊常可以宴安而無虞矣不
探根本責事實今日夷狄僂侮生民重困豈非因循
苟且之患乎陛下以是觀之前日之失可知矣知前
日之失而又重於改作則後日之患將何如哉今政
之弊僂倖姑息濫以成俗矯此弊者非任誅賞考功
實莫能治之上無姑息下無僂倖則奸人無所容矣
上天之戒陛下非不切也陛下答天之意非不勤也
每聽事至日昃而不食然皆有司奏覆細碎之務非
天下之治本伏惟陛下精求久弊不憚改作自總威
令強陽而抑陰自然天心悅豫而萬事舉矣

躋俗於禮

臣聞唐末強臣擅兵分裂疆土五代更易干戈日尋
上令急逼誅求無已百姓無聊不勝其弊奪攘苟活
父子之恩不能相保天下之俗不遵廉耻之節壞敗
爛熟莫知其非我宋之興一革海內休養生息四五
十年無甲兵之患民財贍足侈靡偷薄漸染成俗大

臣者天下之表也相競廣市田宅爭求重利况百官哉况下民哉於是官吏曲獄受賄而抵死者案牘相繼豪富之家狗馬婢妾無有制度縱欲相矜財所不及者則極力爲之恩義之薄而財利之厚上自大臣下及黎庶莫不然也今兩制已上之官居父母喪許不解職欲民興孝其可得乎近臣苟進黨附相傾窳官臣僚日相詆訐朝廷且爾欲民興讓其可得乎衣冠之家至有父子相殘夫婦相剋且下民之愚尤可怪駭况在仕官居民之上而悖戾至此禮義之坊裂亦幾盡矣臣竊思其源蓋天下之治一斷於法法之所禁或避之治民之吏知法而已義禮之坊鉗口不言誠有立經制興禮讓之士俗必指爲濶誕然治天下不由於禮者莫能至也伏惟陛下察俗薄惡擇任賢材興立典制上下有節車服有序禮讓興行僭侈衰息豈不盛哉臣之所言今若高論復而思之甚易行也

任材以宜

臣聞馭邦之大莫大於建官材有短長官有大小故

隨其所宜而任之則事無不舉矣臣以謂今日建官之法為弊至深取之不程其材任之不稱其力因循滋久莫之變更臣請略條建官之弊大者有四一曰材不稱官臣不敢備舉百官之不稱者借如兩府大臣為陛下之股肱繫天下之輕重得人則治其失則危今日之居是任者或以久次或以例遷久次謂累年而至者故張若谷以年老乞備政府例遷不計材能不考功者謂狀元及第數年便至卿相績攀緣而進即授以天下之柄幸而材賢則福及於下苟非其材而使之制群生扶持重器豈不過哉董

仲舒曰小材雖累日不失為小官大材雖未久不害為輔相蓋論材與否也今用一不材則天下之人皆知輕視公相而有苟進之心願陛下熟思其奸邪與不材之人必速退之而忠直材賢之人必速進之救溺之勢不可緩也二曰官守不久借如三司使副判官皆專筦財利臺官諫臣糾正朝綱箴補時闕發運轉運使均輸征賦廉察風俗列郡太守問民疾苦此皆至重之寄祖宗舊規率有年課今之除授但作踐歷資序內則踵迹相躡立登貴仕外則州郡迎送略

無暇日其餘兩制兩省以上近侍之職循環迭取若探諸懷臣欲備舉則文繁乞陛下列向來所陳職局及陝西被兵州郡取二十年已來郡守每歲凡更幾人及侍從之臣凡歷數年因何功效致官至此則弊可知也三曰官少員多臣不知天下建官之數但覺員數多爾先朝樞密龍圖等學士及侍制侍從之官蓋僅有焉今多者至十數而少者五七人三館職名以僥倖恩澤比前增倍又樞密院武臣審官院京朝官三班院使臣流內選人授官之後伺候闕次近者

一年而遠者二年此皆入官之路不定員數紛紛冗食可勝道哉四曰無功而賞今大臣兩省已上官南郊及每年聖節各與一子官非時請乞不與數中轉運使提點刑獄等幸有郊恩例旣以無功迭受恩賞故邊上臣僚小有勞績便加官爵只務姑息蓋勢不得不然自建官以來未有如斯之濫也京朝官三年使臣五年並與磨勘遷官先朝名曰磨勘者蓋考功過今但默默署名無他罪咎或貪墨未敗或都無課最計年取進而至顯官因循之弊乃至於此大可嗟

雙... 卷九
也臣聞易之道窮則變變則通通則久若朝廷立官之弊宜更變之則其道可久矣若夫施設之方陛下儻賜允行臣當條列以聞

肅治家政

臣聞記曰正家而天下定聖人序詩以關雎爲三百篇之首在易家人曰婦子嘻嘻失家節也故正家之道貴乎謹嚴以表天下 太宗朝陳晉尉上書乞戒

放宮人

太宗皇帝宣諭宰臣曰宮中不過三百人

皆有職事不可戒也臣乞陛下以今日宮闈之數比先朝凡多幾倍况又多取閭巷之人展轉給使遂至數多此微賤之流素習鄙俚之事非能知禮度之節苟不嚴肅蒞之令其畏憚則易所謂失家節也自古嬪御之多率皆無益而有損陳隋之失唐之中圯皆以婦人也臣乞陛下特令揀放疎冗之列任其自安以全天地生生之德庶天下之人因知陛下薄於自奉縱有率歛皆緣軍國所須不爲無用之費也

大隆本支

臣聞三代以前分建親族以爲諸侯及天子威令不

行諸侯強盛戰攻攘奪無并微弱秦始皇卒乘此勢以取天下懲前之弊罷侯置守子弟無尺土之封及一夫大呼破碎潰壞漢興鑒秦之孤分立宗族裂地廣大卒有七國之變其後用主父偃推恩之策藩戚微弱王莽依外戚之權知劉氏力孤遂篡神器曹魏剪弱親戚未幾而亡晉室分兵八王迭相攻奪以亡天下唐興諸王出于民事分領兵柄明皇以臨淄王勒兵入除內難及卽位之後反疑骨肉諸王不令出閣恩愛雖厚而實奪之勢安祿山之亂明皇幸蜀諸

王被害者甚衆德宗朱泚之亂宗支略盡故有百王子塚以其不可勝數也文宗嘗欲分遣宗室補除郡吏向外婚嫁終以不斷事不果行及昭宗時韓建包藏禍心先奏諸王不合典兵請歸十六宅及與劉季述同謀發兵圍十一王至石堤谷無問長幼盡殺之朱全忠宴九王於九曲池殺而埋之於是唐之苗裔盡矣而社稷隨之臣詳觀前古區處垂宐乃令至親不相保養可爲慟哭臣請論之三代分封五等相承地小力薄雖強弱相并而周之年祚延及八百秦不

與子弟分封及其亂也無以繫天下之心纔傳三世
遂至移祀漢七國之亂由裂地過大晉八王之亂由
領兵大盛其亡也皆以宗族微弱唐室之制尤爲失
策幽閉宗族聚爲一處百夫環之引首受戮豈不痛
哉使文宗之計果行選擇賢材列補外郡當其亂時
縱不能作勤王之師亦足以自爲安全之計豈肯父
子兄弟盡爲魚肉乎况大盜之興如王室有維城磐
石之固豈敢輕視而竊取哉伏惟陛下鑒前古成敗
擇而行之

好問益廣

臣聞人主聰明莫不欲周於天下然有蔽於近者蓋
詢訪之弗廣耳竊聞民間之言以爲西北二邊事宜
奏至左右近臣當對覆之時多小其事以爲不足懼
其說則曰不欲陛下盡知慮貽主憂其實不欲陛下
盡知之耳陛下盡知則焦勞益深督責愈切當有成
效故特小其事以寬其責也臣輒陳人君之聰明而
興壅蔽而亡者願陛下省責鑒戒焉唐太宗著司門
式云其有無門籍人有急奏皆令監門司與他家引

奏我太祖手詔百僚許令轉對陳論得失故當時號爲英主而聲名垂於不朽皆廣聽而興也秦二世山東有反者而使者輒曰群盜不足憂二世悅之常居宮中與趙高決事群臣罕得進見及沛公兵數十萬至而二世乃驚秦之亡無救矣陳後主用沈客卿理但奏妓縱酒不輟隋軍下陳得其境上密啓猶有未開封者是二主豈欲自取危亡哉然託任非人而蔽蒙至此皆聽之不廣而亡也伏惟陛下監前代之興亡窮當今之事實或邊上大事不時盡聞則民間細碎利害何由不上達伏惟陛下視朝之暇許百僚轉對或召侍從之臣周詳辨論則古成敗今百姓寃隱安邊之策富國之術不日悉陳於前矣

去邪勿遲

臣竊見陛下頻降詔書戒敕朋黨然未聞陛下決然區別而去之臣聞君子以道相濟思進其類古人謂禹稷臯陶轉相汲引不爲比周至於小人以利相合欺蒙險詖殘害忠良以危邦家故人主惡而去之也去之之術在辨邪正二端耳唐李德裕對武宗曰正

人呼邪人固爲邪矣邪人呼正人亦爲邪矣何以辨之譬如草木焉松柏孤生枝幹直上此正人也藤蘿之性必須依倚乃能自守此邪人也其論甚明故人主難辨者不察小人結附之因也臣竊謂結附之因蓋人主不自選任群臣其進用之速者皆緣薦引不考功察實權之所歸小人所聚一士獲進百人趨之更相訾譽寢成黨與人主雖惡之已堅牢而難動矣臣請陛下思之凡今左右近臣出自聖慮自擢用者幾人且擇兩府大臣必於兩制兩省之官陛下豈不思其何所因緣而至於此苟不出於聖慮則其微賤時已有結附之固及其近貴安能自去朋黨唐文宗謂河北諸寇去之至易而此朋黨去之至難臣竊不取夫貴爲天子持予奪生殺之柄而以去朋黨爲難宜乎唐祚之衰矣夫去邪用正則安用邪去正則危邪正參用則危伏願陛下明辨邪正之端正則用之勿疑邪則去之勿遲苟以邪正參用而治天下者譬猶耕石田而待稔也

利惡思困

臣聞爲天下者欲天下之財非以自奉將以致天下之安也故財有常入亦有常出下堪其力雖輸而不怨上無所私雖用而不濫當其無事之時供億恒足雖有兵戎水旱之患無窮之用不致懸釜掣肘有如五代弊病之餘攻戰未已外內兵食猶且思蓄羨財以贖中國男女沒虜者以歸流徙者以定而仁心之治著民骨髓我太宗一統方內綱紀天下之賦於是天下之民賴焉有司嘗擬毀棄弊□□□□□□令滌染合作諸軍旗旛數千種蓋我祖宗踐歷艱難

周悉民人之苦故尺帛斗粟不虛費也陛下承統已二十年迺者邊陲無患用度差廣民言籍籍皆謂祖宗積聚之餘多入幸臣之家及西寇干紀隨急配遣天下騷然一隅之動其勞且爾况有大於此乎三司筦天下之利而使副判官纔至又遷簿書首尾尚未能通曉所言目前細碎誅剝之事以自塞責豈肯爲久計而興大利臣竊見唐陸贄論德宗遷幸之由其畧曰常賦不足卽令促限又使別配設筦權之科行貸商之法闕私收取馬責將家出兵主第王侯咸輸

屋稅裨販夫婦畢筭婚錢一旦盜興用以藉口臣竊思兵興以來贄所陳之事稍稍施行矣今戍兵益衆供饋益多後日誅求勢必愈甚時不幸有旱澇之災百姓貧困奈何救之古者大盜之興皆緣饑旱不足因民之怨求國之隙以爲凶亂朱泚入長安今日吾不稅汝間架以皆取利太深而招怨亂矣近者陛下專勅近臣節減浮費人人莫不歡悅臣願陛下鑒祖宗儉約之德懲旣往虛費之失持今日節減之制不爲左右干請而移之宮中非時賜與非今之制者一

切不行念生民之勞戒誅剝之令則天下幸甚幸甚
兵連慮危

臣竊以國家自北戎繼好以來大弛武備號曰禁軍者日享厚給驕蹇難用前日魏府之兵是也曰廂軍者例充給役刀矛戟矢畧未知名自西羌悖戾征戍屢興舟戰再衄覆軍殺將其故何哉臣謂處將乖宜練軍不實官名不正之所致也處將乖宜者其弊有二一曰將權不專借如諸路帥臣悉委都統之權朝廷每有宣命令與鈐轄都監巡檢從長商量或有事

宜主帥發謀則人人各出意見議論不一退則交相笑病以此爲謀安能決勝此皆將權不專之患也二曰將官不久臣竊見陝西永興鄜延環慶涇原被邊之郡主帥更易不常一歲之間換三五人者爲上者不久處不肯奮然專行法令居其下者皆知莫能久爲我帥不肯稟畏故上下之情不通而誅賞之法不行此將官不久之患也練軍不實者養無用之兵致難供饋今邊郡禦戎之兵非人人可戰朝廷遂急招募據名抽點務爲多數邊臣但苦兵寡不計強懦至

則收之以是度之冗食者不可勝數也唐方鎮之兵不出行征討則以本道租賦自贍故選練至精可戰則食食則無不可戰之人也我太祖太宗朝四方未一用李漢趙何繼筠治滄棣北備匈奴用郭進守邠州以扞河東於是下蜀取交廣當時西北則守東南則攻用兵之處比今倍多其時圻甸未廣租賦未豐其饋兵軍常足也今天下一統兵戎比於西北二陞而賦稅百事十倍於當時而常苦兵少及饋運之不繼何也蓋當時用兵之處雖多而所用之兵養薄

而藝精藝精則用不必多養薄則易於供饋今之兵卒多求上軍役者卽收之不暇惜費今之一卒可贍昔之三人又藝能不精愈多愈敗此所以兵多而難贍臣故曰養無用之卒也三曰官名不正借如諸路帥臣其官以都部署安撫經畧招討爲名是委以都統之權其將佐曰副都部署鈐轄都鹽鹽押等均作賓禮見主帥至於分管兵馬自爲部分非如軍職節級相轄唯主帥則部管之蓋以都鹽之名本是鹽軍自餘殿直諸司使副皆是內庭之官若令軍禮見主

帥則於禮不安若令不相統帥又不可成軍臣故謂官名不正也爲今之策臣請改正官名每路立成一

軍如都監之類盡改軍職

如遊變排陣之名也

節級相轄一以

軍法從事如違犯並依階級條貫施行官名旣正則將權可專將權可專則練軍必實練軍必實則所用之兵必寡所用之兵必寡則易於供饋以守則固以戰則勝或朝廷疑其成軍之後其力難制則事平之日分散其權可也于今之計非成軍則無有成功其勢不得不然西寇干紀已歷四季未卽誅剪今不蚤

圖改變設使幽薊少警將何以待之臣故曰兵連慮危者以此

法令必信

臣聞管子曰國之重莫重於令令重則君尊君尊則國安故虧令益令留令非令四者皆成無赦是知令之不便不可遽行令之既便不可遽更人君持此柄以運天下者也今朝廷每下詔令尋卽變更士民相詘期以非久州縣之吏不敢遵行臣請以一事質之自西兵以來陝西科民爲兵京東京西百姓驚擾至

於斷指薰目以期苟免其時詔書布諭安慰京東京西之民示不復點爲鄉兵今又籍之矣又陝西河北初點爲鄉兵詔書諭以防守城池不復黥墨今又黥黥手黥面矣此皆朝廷發大號令告于四方丁寧切至乃首尾相戾如此使民何所取信哉今又樞密張觀邊臣趙振等數人皆以軍事不前責降曾未踰年加恩牽復始者無過則不應譴責若其有過不應寬假爲令若此欲百官畏服萬民順信難矣願陛下少紓聖慮思其紛紛更變之端前令之是則後令之非

後令之是則前令之非察其是非謹於出令則朝廷
尊而天下安矣唐文宗曰爲政之道自古所難宰臣
李石曰朝廷法令必信則不難也則知古之君臣皆
以法令爲重非臣徒爲空論耳幸陛下留意焉

恩賞無私

臣聞天下之道不私於物其所以生而所以殺者萬
物無從而歸其所宰故天之道至大矣聖人法天以
至公令天下功則賞過則罰無私焉萬民服矣朝廷
於賞罰之柄有無功而賞者有過而失罰者臣於前

篇論之詳矣然罰不行而賞太過此乃立法之弊非
陛下之私也臣所謂私者竊聞頃年有勅旨停罷內
降今又行之大凡恩賞固當出於陛下之所決若罷
之則是人主都無威權盡出臣下此則不可也然今
之內降或緣婦謁內戚宮中因依僥倖苟求恩寵非
陛下擢用英豪旌錄功績故每有內降恩澤人或疑
之執政之臣又不能堅持正論以輔盛德徒欲阿順
主意不謂於陛下無益也古者水旱不時人君親於
南郊以六事自責曰婦謁盛歟菀苴行歟故婦謁之

雙苑齋齋
卷九
盛苞苴之行古之深戒今僥倖內降者苟非親戚必
因貨賂然後乃請若陛下從而行之是示天下以私
也唐中宗朝宮掖不肅嬪嬙左右出入無節遂至廣
納貨賂別降墨勅斜封授官臧獲屠販之類累居榮
秩卒爲禍亂此前世之鑒伏惟陛下總攬威權抑去
私請苟用一賢人出陛下之意雖曰有內降百官萬
民相與稱道之不暇孰敢非議也

威福是守

臣聞老聃曰魚不可脫於淵國之利器不可以示人
爲人君者深知此務則威福之柄臣下不可得而竊
之也威者兵刑而福者恩賞之謂是二者有一失而
得於下者其國必危有公然而假於下者國必亡三
代之未齊假於田常晉假於六卿以取其國秦假於
趙高而天下潰漢假於外戚而王莽作東京假於強
臣而曹丕立魏假於司馬而移祀晉假八王而兵亂
宋齊梁皆假於大臣而相繼攘奪唐之中世假於宦
官而宮闈禍起此皆人主不自總攬威福而假於下
卒至危亡故兵刑官賞之柄雖大臣外戚宗族宦官

皆不可假假之則人主失其操持而自取危殆也臣竊見數季以來兩府兩省之官遷轉甚速雖曰循例不限季數趨利之弊日遊權勢獲進者自爲私恩而罷者歸怨於上臣恐恩賞之柄暗行於下也臣請以一事言之今陛下少有差失之舉則群臣莫不交口議論期於諫止而大臣權貴之過少有肯言者何哉陛下天慈仁恕每有言事者雖上論聖德然未嘗怒之或論及權臣苟不顯行譴謫則亦陰被退抑而嚮之者皆與進用臣恐大臣權貴之過陛下罕得而知也以此觀之臣下之威過於主上主上之恩行於臣下其勢顛倒未爲得也伏惟陛下躬持兵刑官賞之柄以治天下則百官歸而恩信行矣

聽斷不疑

臣聞聽與斷二者相資而終始之者也聽者取於衆言者所見不同或懷私背公或阿順主意故是非紛糾所以人主但務博采兼容而要之斷也斷之爲義時有緩速而理有得失違於理而失於時無術之甚也有中於理而失於時或適於時而違於理其爲患

也亦均矣唯適於時而中於理乃曰善斷故聽之道務廣不廣則壅斷之道務審不審則移唯天心仁德者善聽唯剛果明辨者善斷故曰聽與斷相資而終始者也伏惟陛下天仁洪覆包容萬類每日臣僚論事陛下未嘗不欣納假以溫言使之得盡其說可謂善聽矣然採於衆言時有更易不決然主於斷也臣愚善度天心非不勝斷所以未至於斷者蓋慮或有未審故優游不盡斷之之道臣竊謂欲斷之審莫若頻延近侍講議禮要廣接群臣詢訪時事聰明益至處置自精何患斷之不審也易曰天行健君子自強不息聖人法天以剛健決物伏惟陛下法乾剛之道專決斷之明臨事不疑大隆治道蠢爾小寇復何患乎在陛下力行而已

太平可致決所施爲

臣聞易曰危者安其位也蓋安危之理無有定分在人君之所爲危而爲安者自古多矣朝廷自用兵以來屢下詔書詢訪材謀魁傑之士或令近侍各舉所知收用雖久未聞功績灼然者將任之不盡其材歟

抑天下無可任者歟謂之無賢材則厚誣於世矣漢之興驅馭英雄以成大業皆秦之遺士也唐之興取隋之棄人以安天下故賢者無世無之顧取之用之道如何爾陛下當三聖之統紹祖宗之業宇內之廣生民之衆莫不傾心以期太平願陛下勞於求賢而佚於任使修明紀綱興行禮教則太平之治其猶指諸掌乎右臣謹具如前臣奉詔旨許令言朝廷大事邊防機宜臣所以竭思畢慮論當今之要務伏惟陛下寬恕狂愚特貸誅夷之罪或賜施行又慮臣文候勅旨

字暗晦事理未明臣上殿之時乞賜清問庶盡臣懇懇之至干冒天慈臣無任戰懼之至謹具狀奏聞伏候勅旨

宋蔡忠惠文集卷之九終

宋蔡忠惠文集卷之十

明後學吳興蔡善繼伯達甫校

制誥

中書試三道

金吾衛大將軍除邊鎮節度使制

門下天下之重惟將相之任必在於得人閩外之專
有文武之資乃可以屬事眷茲藩屏控夫朔陲開府
文書董纒緜百萬之衆備邊亭障實耕桑什伍之人
求其遠御之良付以中權之劇厥有成命告于廟朝

具官某沉勇本於天資練達通於世務有明敏之智
臨機而必決有方厚之質自信而不疑久歷官聯關
總環衛廉行徼巡之道督刺大衆之居士旅勅馴寇
攘衰止嘗以清閑之宴與之從容而言亮其忠純授
以節制於戲甲兵乃刑之大軍旅以禮爲先爾其察
甘苦而周下情明法令而一羣志又綏封畧旌錄勳
勞惠愛究於黎元威聲伸於大漠副茲委用勿懈乃
心可

禮部尚書除御史大夫制

門下朝廷興治之原法制修明爲大內有公卿臺寺
之衆外有牧守方伯之聯察繩其違第次厥課秦漢
而下專委中書祿秩之崇差貳上宰所付茲重惟才
之求具官某服先民之言承名家之學文章深厚以
華於國行實朴茂以充其申歷侍禁嚴益劭風問嚮
居都座嘗典春官傳經決事而甚明飭躬率下而自
正是用獨持朝憲彈肅官師夫聲利不怵之謂剛端
勁不阿之謂直獻議每形於鯁亮舉邪勿吐於權豪
汝服斯猷往勵而屬可

郡國察孝悌力田詔

勅朕念古先聖人極遠慮而垂大法元元之民其生長也有教育之地故能興行於家力作於埜親族和同愛是以相恤衣食贍給力足以相保然後獄訟衰而盜賊息以格於治平嗚呼其盛也哉自戰國歷秦重利而寡恩孝悌之風薄矜奢而廣欲惰游之手衆驅人於不善率由是已豈斯民之性有所偏異蓋導之之具至與不至耳今朕居士民之上唯內竭至誠奉祖宗而惇族屬外務村素却侈用而息煩費思與吾人尚本而棄末然而生齒之聚或戾於教義而困於饑饉者其導之未至歟今郡國長吏皆朕協力而宣化其有孝悌章明勤於田畝可率鄉黨者其以名聞朕將錄之以風天下

右正言直集賢院同修起居注韓絳奏臣竊見臣僚奏薦文武官頗或所舉無名所稱不實妄冀朝命以爲私恩伏恐請託公行重增爵賞之濫此弊不革爲蠹實深欲望聖慈明降詔書嚴行約束今後中外臣僚已係擢任若提點刑獄已上並不得

傳文苑英華卷一百一十五
三
薦舉如有所舉無名所稱不實違犯詔旨並仰御
史臺察訪事由彈奏伏乞重行朝典候勅旨無近
季以來中外臣僚奏舉官員內有人品庸常薦章
交上亦有宿負罪累迹狀醜濫者乞行雪復奉聖
旨令降勅戒勵

勅朕制臨天下思賢與材而共治之故開薦舉之路
又於羣臣無有疑問故所薦舉多亦陞任然比年以
來或所薦者材資其薄加之品目下人遠甚然有公
卿交牘稱道或宿愆醜濫曾非摺註請行湔復或職

任疏遠不稱重輕引援清近迹其本源豈非造請銜
鬻者徇依權門無廉耻之行交結恩私者苟茂王爵
無公共之志不然何以臻此不知不賢而言之茲曰
蔽惑知其不可而言之茲曰欺罔左右官師懷此事
上嗟予何賴誠心未孚遂置於法朕甚愧焉其令御
史臺察訪中外臣僚奏薦如有所舉非其人者立須
彈奏必行之罰宜自近重茲伸警尚體予意

廣南轉運使元絳奏南海洪聖廣利王獠賊
至廣州城下官吏等屢禱有應乞加崇顯

之號奉聖旨特封昭順王制

勅易載害盈益謙之旨蓋神道正直必有輔於教也
厥有陰相吾民沮遏兇醜應荅明白不列美稱曷以
揚神之休南海洪聖廣利王惟王廟食遵爵表于炎
區季旣遠矣唐韓愈記稱神次最貴且有福禍之驗
國家秩禮祀等尤高康定中朕嘗增王徽名牲幣選
數罔不稱是今轉運使絳言迺者獯獠狂悖暴集三
水中流颶起舟留三日逮至城闔廣已守備火攻甚
急大風還燄閉門渴飲澍雨而足變怪屢見賊懼西

遯州人咸曰王其恤我者耶朕念顯靈佐順靡德不
酬其加王以昭順之號神其歆茲顯寵萬有千載永
庇南服

廣南東西十一路轉運使提點刑獄揀放配
軍勅

勅朕臨馭海內念憂元元冒以至仁期於遂性比因
郊祀赦宥辟刑顧惟羈隸之人特解錮留之負或能
悛省不仍舊轍者遷移便地或加癯老不能自力者
去籍遣原列郡守符監州使傳悉心按視以稱朕懷

皇姪從質贈觀察使追封侯制

朕惟至治之主本於仁愛內澤宗族以化於下矧予
視弟之子親於屬籍季不克永朕甚悼焉具官某忠
恪以立朝信厚以行已久更環衛薦歷歲月休有令
善著于羣聽今其殞逝重以優恤增廉使之秩啓侯
祉之封餘終之恩於斯爲厚惟汝之靈歆是嘉寵

呂士宗男克禮試秘書省校書郎制

以爾父久歷煩使方茲引年命汝以官往試秘省夫
仕宦善歸而嗣子有祿始終之典可謂厚矣汝其勉

勵以稱恩寵

徐介張倜並著作佐郎

勅國家爵賞之設以待賢材計秩遷官殊非本意然
殿則有罪而最或不遷又非所以馭吏之法也爾等
並緣保薦分幹權利校課所當宜在陟典夫先中文
詞之科今列撰述之局其資盛茂爾宜勉之

成端夫奉禮郎制

勅具官坐墨奪官理宜廢棄屢更歲月或能省循敘
還京司實爲恩渥勉新刷故以務後圖

田京工部郎中依前知滄州制

勅具官迺者大河之北遭罹水患板戶貧困冗散旁郡朕甚愍焉屢勅所部每加矜恤人情懷土而未聞還集汝京所守濱海都會襟帶之固兵師所聚而能上體予懷下究民隱申慰勞來歸占者衆使者條狀願爲褒異文昌草議起部要司命汝踐之用爲增秩夫計功實與累日月而遷者固有異矣汝念此意撫安居人可

李絢男秬特授太常寺太祝男秬將公監三

簿制

勅某官某男某等朕念乃父蚤中科選以文華深厚而居詞命之職以材智聰明而付浩穰之治方膺外補奄爾淪逝錄其副子以伸予懷或遷于禮臺或麗名匠寺並爲優寵勉自進修

田九思太子中舍致仕宋象國子監丞致仕

制

勅具官爾等久歷州縣願還官政念其退止宜伸恩典或進與官坊或叅名庠序持此以歸示於閭里亦

足以爲光榮也

胡某可充翰林侍讀學士仍舊判銓制

勅朕念君人者左右前後皆正人則諷諭顧問之間莫不循于治道故侍從之臣心在精擇而况觀學之職尤其重者自非飭躬端御今上名濟以文業則不與其選也具官某勁清有守臨事不回記問該閱屬詞精敏久居禁掖日有嘉稱今命汝以金華之要爾其考聖人之言攬前史之載有以發智慮之明作安危之鑑者附當世之事而爲朕論之使授受之際謂之得

人豈不美歟

何某充龍圖閣直學士知秦州制

勅朕惟關陝之右冀門爲重內宿兵師百萬之衆有政令之決外連羗夷千里之遠有綏安之畧必欲恩威行而士伍服信義著而種落附非有文武之資者不可以輕授具官某爾以文雅中詞科以智敏被器使典訓誥之職而復於深厚歷官守之政而濟之果斷會秦闕帥御今上名擇其人惟汝之能斯可往治輒自禁垣之要增以內閣之嚴若夫人叅侍從之聯出委

藩翰之寄士林華選爾實兼之隴道之雄爲天下首
講訓綏輯控制外虞使朕無西顧之慮者汝其望也
勉樹勳績以稱休命

褚士言王世範並大理寺丞制

勅具官某等天下郡縣之吏其負以千萬數材之與
否莫可周知惟監司長吏以善狀保薦者則校閱閭
而升獎之以勵能者爾等効官有勞而舉者又以連
罪爲任往丞棘寺並爲優陟夙夜思省以答茂恩

李君俞授大理寺評事制

勅使爾爲倉庾之吏而粟不可食奪免一官以戒不
職今所監之司皆曰向以西事應猝便辦蓋無他腸
又所輸粟移之秣飼厥數不減屢更郊赦之澤請還
京寺之僚吾其從之爾當自省

郝周授太子中舍致仕

勅具官某受吾俸祿驅馳州縣至於衰老今其歸也
可不念其力乎遷與儲坊爲爾光寵

未服舊官人內殿崇班李昭素復內殿丞制

勅某官汝嘗失刑民處非罪奪官旣久省咎則多復

禁省之舊聯實朝家之優渥勉遵成憲勿蹈前爲

侯宗亮授西上閣門副使

勅具官某帝者日臨法宮以朝群臣宴御便坐以講庶務臚傳離令之美贊相規儀之多惟二閣之權允司其事予欲擇其能者非敦良敏茂之人莫能勝其任也以爾某姿性格毅器質淵通周旋軒陛之間屢更寒暑之變宣納夙夜罔有不勤出入禁巖罔有不御今上敍爾績効進貳使名朕左右之人所藉者雖衆御名要近之職得與者無幾汝益修勵以稱寵靈

趙借著作佐郎范孝思大理寺丞

勅具官某等郡縣之下勤勞職事歲考滋久而能勤檢操履爲保任者所知朕常與進用以勸焉爾等咸有吏資著于銓筦條列績閎當於陟典或叅秘丘之選或進理寺之名各服寵章益劬來效

故太府卿畢世長男從益將作監主簿

勅具官某男某以蔭入仕深塵奉所進列卿位屢更藩翰因其淪逝閱其子姓一門之內咸列官簿然恤孤之典朕乃不忘唯爾從益頃試匠寺今與卽真爾

毋不勤以墜寵命

薛讓內殿崇班

勅具官某向以馳驛邊障將命往還旣涉歲月不亦
勞止升聯殿陞視秩朝闈茲爲袞渥之隆用最官成
之効徃欽爾次無怠厥修

閻旦國子監丞致仕

勅具官某占名中銓逮于暮齒謝還官政退休其家
念爾知止進承上庠徃服茂恩以安汝志

武日宣贈忠州刺史

勅具官某綏懷之德不及蠻獠至使拔其種類寇鈔
嶺外徑趨清海鋒氣尚銳爾惟邏巡之職實司剪捕
之能忠果挺志勇毅自奮身先士伍轉戰不已兵力
失利沒於關格遠聞予聽終夕悼惻特推恤典列于
刺部忠魂如在歆此哀寵

曹觀贈太常少卿趙師旦贈光祿少卿

五嶺之表面內以來南連海澨西屬蠻峒未嘗有鳴
桴之警故守封之臣幸其無事莫爲戰備迺者獠衆
猖悖乘襲疆場爾等並分符竹封典州郡當賊鋒銳

忘身殉國嗟乎城池不足以爲固甲兵不足以爲衛
陷於非命傷惻良甚恤恩之厚並二卿列汝其有知
承朕此意

董玉等贈禮賓使趙允明等贈作坊使

勅具官國家設警巡之職用以誅磔寇盜撫安人民
有能成其官者朕嘗旌異追進名爵收錄子孫所以
表忠義也蠻方猾橫弄兵嶠外爾等咸以忠勇疾憤
狂寇擊刺襲躡遭罹不幸朕爲人父母而使汝等身
膏草野妻孥望祭萬里之外心焉哀惻其何已耶特
寵使名以慰幽路靈其不泯歆我嘉命

萇用和贈內殿承制張元等贈內殿崇班

勅具官有生而處磨滅者衆爲忠魂蒙烈雖沒不忘
汝等參於裨校往捕寇攘矢石之間殞其驅命朕心
哀愍特優恩恤追榮近墀賁終幽窆冀爾靈魂享是
嘉寵

劉冕贈贊善大夫李稹贈光祿寺丞

勅具官某等並爲嶺外州縣之吏屬以蠻峒徭蠱毒
我剌郡恃兵跳梁殺辱紳笏汝等並懷忠節捨生不

屈朕惻然義之特行哀恤追褒宮寮榮贈宗司靈其
歆之良慰汝志

張茂實節度觀察留後

馬軍副都
指揮使

天下之本在於京師而宸極之下必有材勇之士居
則拱扈威陣出則番茂外國分建三帥以治其政茲
率故典厥惟舊矣今予有百千萬數精銳熊虎之衆
曾是強毅有能爲予訓忠義之節明法令之禁者吾
其用之具官某有沉敏之才通夫將畧有謹厚之行
達于予聞擢領萃屯翊侍軒陛惟時蚤夜罔違靖恭

遷兩使留務之名總萬騎選鋒之勝車田符籍爾則
專之噫以嚴一衆其術匪難服于衆心其道匪易平
直無頗情乃上貢廉明不撓惠乃下究委注惟重欽
哉惟承

王凱殿前都虞候王達馬軍都虞候

勅國家列三帥以治拱扈之師設虞度以二董齊之
政非得沉武之資敦信之實者無以條理尺籍嚴威
環衛朕嘗於是擇而任之具官某用之邊圉敢於戰
格而服其士伍具官某遣之戍禦奮其材勇而聲在

戎漠咸以勳績分提禁旅藉其能力尚取疆陲外倍
殿陛之崇佐護騎屯之次候奄至重倚信彌親爾其
下達於衆情上裨於長政恭勤一志毋懈厥初

韓絳右正言

勅具官某百執事各修其政而諫諍之臣得與國論
其職要其責重故難其人先朝命置六員而終不克
備朕每擇是官必深慮久之而後行信乎其人之難
得也惟爾絳擢在高第屢更器使執心方勁落落自
立令易處西省往備諫列若夫罷軟而畏權要附阿
以希進用激訐以干譽煩碎以欺俗有一于此茲謂
壬人術學通於大體言議中於至理弼違箴闕以補
不逮知而必爲靡悼後患有出于此茲謂正士予期
汝絳作予正士可不材哉

申房潭州錄事叅軍監京山稅

勅具官某向治征筦最日有勞督儲曹於外邦商美
利於劇邑關市之務本以察譏爾屢爲之母或苛媯
諸葛冥知楊子縣韓鉞卽墨縣令

縣道之設尉屏兇盜而獲善人所以助令興治者也

空官有罰救職有賞而勸沮行焉爾等捕除攘奪成
應遷格或試秘省分治劇邑有民有社可以爲政勉
材平直以稱褒典

李宣德大理評事致仕一作德宣

勅具官某士之壯則從王事老而歸則教鄉黨未嘗
不爲善以助治也汝掾于劇郡逮於暮齒願還官政
引卧丘樊遷丞京司以需朝渥爾之仕與歸亦有助
於治歟可

何中立男景先將作監丞

勅具官某男某以爾父輟自禁垣往帥邊服在注倚
之尤重必寵數以兼優爰露奏封請任其子命丞工
監之列用爲侍從之華勉勵清修以永多慶

范仲淹男純粹等四人授將作監主簿

勅故資政殿學士戶部尚書范某男純粹等仲淹素
竭忠力勤勞王家不克永季奄爾淪逝嗟其材賢不
可見已並錄子姓逮於族親或列名京僚或試秩監
省始終之典予唯不忘清白之訓爾宜自勉

范仲淹外孫賈公直試將作監主簿

勅某朕以仲淹勤勞王家忠義一節奄爾淪謝悼于
予衷錄其外姻試秩監省勉思所立毋忝異恩

李守寧劉汝翼並監酒稅

郡督郵之任蓋所以紀綱政治糾糾司過忒惟強明幹
敏者乃可爲之以汝等嘗歷諸曹復有歲最寵以都
掾之目泄于征權之局夙夜思勉毋空厥官

王礪開封府判官孫錫開封府推官

勅具官某等材不敏明不能決穰劇志不强果不能
糾豪勢法令不通不能繩姦吏賦役不均不能恤百

姓予惟京府之職嘗患四者之難故求其人以二尹
以以爾礪雅有吏資嘗參憲職試能滋久恢然餘裕
以爾錫麗名詞館平覆刑書將歷要塗必更幹任並
佐浩繁之治且觀贊助之方服予訓言以竭忠力

徐起光祿卿知兗州

勅具官某趙魏之域爲天下重宿兵聚粟以鉅萬計
汝起曷爲使者將漕鄰部輪置金繒以濟須給嘗以
陟典戒從近歲德推朝渥乃正卿秩宰膳之寄尤爲
嚴近勉圖績効以稱嘉寵

李先轉職方員外郎

勅具官某爵賞之貴以馭于下凡與遷進必校勞實以爾嘗歷臺署往蒞民政績移歲筦居有功闕在法應陟予何嗇焉郎等唯三乃踐以往膺褒前進益樹勤力

曹頴叔充天章閣知福州

頴一作穎

勅朕念善爲維持之策者運天下如臂使指欲其大小相臨而威令必達故也東南之郡長樂都會表山環海地險而遠八州生聚繫乎總帥非有幹明之資

能辨吾事者不可以遣具官某智力精敏應幾必決荐更器任籍有聲稱將漕益部還貳計省而猥繁之務固不給肅今屬以方面之重寵以延閣之華爾其繕除兵械補完城堞懷綏困窮剪遏兇猾使吾人無愁苦之嘆朝家有專倚之賴朕志惟是爾儀圖之

張昇充龍圖閣直學士知秦州制

勅侍從之臣雖出撫方面每被美名以爲光寵况內閣之重苟非耆儒厚德或材通器任者不是與也具官某方嚴出於天性識慮成於學術向在臺省有鯁

亮之稱逮臨邊圉有綏靖之畧朕念冀門鉅屏羗夷
雜處板戶繁富軍旅屯萃今升秩以龍圖之職屬以
隴道之事汝久蒞戎政備體忠力無復多訓尚服休
命

郭申錫侍御史

勅郭申錫御史府之職正紀綱繩愆繆外以肅官師
內以獻忠謹名爲清要固難其才朕尚令近臣保薦
庶乎得人知雜御史擇行以爾申錫塞詔擢自郎署
之列徃膺柱史之任汝有鯁正之志精通之議必竭

爾慮以達予聞

趙琪宋詢並特授屯田員外郎

勅具官某國家遇官人者之意甚厚凡三歲則比其
殿最按其所當而升黜之其間雖無較然治狀之明
而能廉謹自守者亦不遺也爾等監視州郡或臨縣
邑計奉應法用遷爾秩郎官清列推重於世咸務循
勉以稱恩渥

劉宗旦授錄事參軍監酒

勅具官某汝尉于縣而能擒誅寇盜謹勅其職攸司

考課當乎賞等升郡紀綱往臨摧酷自力來績以報
甄錄之異也

韓周內殿崇班

勅具官某堡障之任刺視疆境護防居人幹謹其事
逮夫三歲斯亦勞矣遷與禁墀之列通聯朝著之榮
虔思茂恩以立來勅

高允元授供備庫副使

勅具官某祇事內廷素尚忠謹寢延歲筦益著勞能
使介之名禁墀尤重特推渥澤俾進崇班勉敦夙夜

之勤庶荷褒遷之寵

張白大理寺丞致仕

勅具官某向從祿仕謹身無咎今謝官政推恩惟厚
讞刑之秩顯於京曹被榮而歸寵爾衰暮

程戡充端明殿學士知益州

朕撫御寓內恃之久安使上澤周達遠情不壅者蓋
有賢能爲予鎮守方面爾蜀道天險劔外遼絕每委
帥臣俾之專決列城側首以承教令今之借威權託
腹心者無與爲比其於選遣豈輕也哉具官某以文

中高科以材任煩使入居憲臺而豪貴斂迹往臨藩
翰而孤悍蒙福回翔禁近號爲恭謹獻納謀議關於
機宜升榮秘殿分寄益部形勝謠俗汝嘗知之夫以
刑制民良而不戴寬恤征賦使之便安予爾賴焉爾
其勉力

沈惟恭遙郡刺史

勅某官某刺部之雄在克尤重今雖遙制必勳勤戚
舊者然後命之以爾蚤由武材久處禁職間有疇勞
之舉與其滿歲而遷申復朝恩俾司郡契益思勉茂

用對寵靈

石中立孫祖冲試監簿 進祖文集

某人惟爾祖中立嚮以文儒參與政柄忠朴淳謹爲
益良厚而其淪逝之日既久爾能纂輯遺篇削藁來
上追念曩輔惻然不忘京監開榮用顯存沒爾宜修
勵無忝茂恩

王璪屯田員外

勅具官某爾在邊帥幕府旣以材智贊其方畧又以
經營儲粟備辦豐實按格所當宜有遷陟文昌郎位

爲仕清選用疇爾績恩澤甚茂勉務來効以荅褒進
賈德明任承睿可都承旨

勅具官某等樞宥之府所承稟而宣行者皆禁密之
命必求謹厚之材乃可備於陪屬以汝等有恪愿之
資加肅給之敏麗名機務實唯勞舊按其資歷擢總
綱領勉思勤蓋尚副褒寵

張繼渥承旨

勅某人蚤以材敏屬麗樞庭積延歲月之勞益敦夙
夜之恪進承旨命特示寵榮祇荷恩遷愈罄誠志

毋湜侍御史

勅某官某帝者嘗欲達聰明于外而與議者重於得
人士大夫嘗欲獻可否於上而抱材者難於得位朕
侍臣拱辰言汝湜端方有學可以備憲臺之職擬推自
郎署典於柱史爾以儒進當通理道之要歷更拜使
固知世務之本繩違正失罔戾厥中服命惟處益樹
厥志

皇兄承幹贈節度使追封蕭國公

勅朕嘗覽前史天子之宗族有惇良之行終始顯榮

者固已稱嘆况予弟兄躬是賢德存則接以恩禮歿則伸以哀祿所以勵于本支而儀于天下某官某承流慶源敏稟善性持信厚之誠而表於屬籍竭忠盡之尚而壯于藩翰歷季不永奄罹殞逝臨酌傷惻特加愍贈飭以節鉞之重躋夫公衮之列靈其不昧歆是休命

皇姪孫世宗贈防禦使追封侯

勅帝道尚親所以廣恩而推愛也朕於宗籍惇睦良厚其有殞奪每加褒典某官某貴聯天屬躬蹈義訓飭行有恭靖之美嚮學有沈敏之善已叅環尹久奉禁朝遽此云亡予實汝惻進扞防之使紱仍疏啓於侯封瑩魂有知尚歆榮渥

任遠濟州司馬致仕

遠一作達

勅某官向臨征筦之局妄加刑罰于人在法所當奪官而癡憫其老疾特示寬宥方州典午之曹憲臺柱史之日率爲兼命宜體厚恩

宋蔡忠惠文集卷之十終

宋蔡忠惠文集卷之十一

明後學吳興蔡善繼伯達甫校

制誥

李樞供備庫副使制

勅某官獠衆弗順寇鈔嶠南州郡用兵調發饋給爾
爲使者循行往來按視良苦升榮禁闈就總戎鈐勉
圖茂勳思對優寵

王塾衛尉寺丞制

勅具官某國家邊陲之事必以兵師伸其威武然儲

時廩食務於流衍使者以爾勤力收斂補於漕輓升
榮京宋圖厥勞効勉勵爾志以答恩渥

李宗儒可內殿承制制

勅具官某爾以武林往涖邊堡種落懷附斥堠甚明
眷言帥臣遠形需奏特升聯於殿陛俾耀寵於塞垣
勿忘欽承勉立來効

葉均可大理寺丞制

具官某官賞之法所以磨勵世俗旌拔賢材然有勞
而陟與累日而得者差異也爾治劇務復積歲功於

格應遷命丞理寺勉修成業以稱寵靈

司馬京可衛尉寺丞

監秦州在城酒

專筦利資以佐公上必用廉飭乃有羨贏計課應遷
京曹是踐勉尚修勵祇荷恩褒

范祥追官知州制

勅具官某爾爲使者權涖冀門建言羗酋願上土壤
國家不羸尺地之得尚安遠人之歸再屬經圖務存
久靜爾浹陳便利堅請完修但知開劃之勤殊失預
備之策致茲寇盜乘隙鈔攘興戎之端厥咎誰執奪

去一秩典臨外州實爲寬矜勿忘循省

克棟可右衛大將軍制

勅帝者宗屬惟是飭愿自守其履尚固可嘉矣况乎
潛心經術發揮詞業不有恩數之厚曷以勸示來者
具官某植性端靖顓務詞學屢形章牘願較藝文給
試禁署預列名等特遷環衛之重以躋稽古之効益
思爲善以對光寵

李評殿中丞宋敏修太常博士楊慥奉禮郎人

學士試到奉
聖旨與轉官

勅具官某等天下以文治而士人以詞進者爲日舊
矣惟爾評生於貴戚蚤聞善訓綴學屬文特然有立
敏修暨慥世以儒聞能名其家經術益茂命試列等
粲然可觀或遷殿省之聯或舉奉常之列卒爲恩渥
勉務敦修

皇姪宗道贈觀察使追封侯制

勅惇睦至親故事之重褒顯令德治道之先矧惟宗
藩之亡宐有哀祔之賁具官某知爲善之樂篤好學
之心棣跼承上以光華麟定應時而信厚久司環列

之重遙總州兵之雄天奪厥齡予深其悼命以觀風
之重徹茲書社之榮冀汝幽靈歆此恩寵

其昭吉特授文思副使制

勅具官某性質溫茂材資幹明久叅省戶之嚴仍寄
帳兵之信服勞益謹第課應遷優陟使聯用推朝渥
勉敦爾志以永厥成

鄭紆可職方員外郎馮炳殿中丞制

勅具官某等向以狂獠肆毒嶺嶠之南臨遣帥臣往
殄兇醜爾等皆以材敏實從征行還上功次之條宜

有遷褒之澤序升郎位擢與省丞並爲恩榮勉務修
飭

余仲荀可太常寺太祝

勅具官某等向遣樞臣平定戎寇還上功狀之實采
紀驅馳之勞爾等咸以材能嘗與軍事或進秘丘之
列或升禮寺之華勉圖進修以對光寵

梁惟一可大將軍致仕制

勅具官某天資粹謹材幹敏明久叅宸內之聯比嘗
任使之劇日親藥劑屢易歲華備陳懇實之詞願解

信要之職擢於環尹俾遂家居終始之榮汝其至矣
許士廉太子中舍依舊知梅州制

勅具官某等百粵之壤風土異宜爾分守符實處嶠
外積勞累歲具于有司最要之凡合於遷格進陪宮
案仍涖方州祇荷寵榮勿忘省飭

皇后妹仲翹新婦特封鉅鹿郡君制

勅樞躔紀節茲乃慶辰綸渙推恩厥惟舊典矧乃后
宮之戚宜推湯賦之華某挺秀名門蚤服柔範動靜
鑒於圖史夙夜謹於紘緼嬪于宗英著厥閨則宜徹

郡甸之號益峻封君之榮思材懿恭用欽寵數

貴妃妹封清河郡君制

誕慶講辰睦姻疏寵眷惟妃位之重願推女弟之恩
舊典具存明命斯允某生高華之族稟茂淑之姿侍
姆教而甚嚴奉閨儀而愈今上御名親爲外戚陪嘉節之
祝延地啓名邦峻封君之等數宜推優渥益荷顯榮

王用西京左藏庫副使張玉內殿承制

勅某官某等前遣專師平定狂獠還列功次第推恩
賞近因振旋引對便坐陣行分合而中法士卒擊刺

而奮勇再遷使秩式承制旨並為旌寵宜材忠力

兩府兩制聖節奏弟姪京官或試監簿

誕慶之節公卿在位忤呼稱壽罔不和悅朕嘉與近侍共樂無疆恩于而家用為榮寵命爾京秩漸于官政方圖德業毋懈夙夜

宰相參政樞密聖節奏薦子孫各京官制

近以誕慶佳節惟一二弼輔之臣奉觴以上萬千歲壽誠懇精至詩不云乎無德不報乃以保任之法除子孫官列于京司所以彰朕之意而登爾於仕也可

不材哉

武世長于可久並內殿承制

爾等陪屬宥府幹敏著稱從征兩方復主符籍以謹密歲年之舊加驅馳戎馬之勞積是最成宜推渥澤升聯殿陞傳奉旨辭甄獎之華往服于命

林珣贈大理寺丞

頃者盜起南服震驚朕眾汝掾州郡遭罹非命盡忠隕首誠節可尚讞刑之秩用賁幽宥

贈王允迪長女錢隆稹妻封郡制

慶毓嘉節率均恩渥矧惟宗藩之逝藐焉息女之愛
形于薦引當列名號徹名邦之華壤厚啟族之懿典
褒與之重爾宜欽奉

唐中和可內殿崇班制

勅具官某蜀險而遠欲以知風謠情狀者必擇明曉
事機之人乘驛往來以通上下之意奔走三載厥惟
勞止此其還歸宜有敘進殿墀之峻朝紱之重爾宜
勉力以報優獎

高若訥可尚書承制

予觀前世君臣之際進退以禮始終以義者厥惟鮮
乎故予於左右承弼之人尤其今上者其有竭忠淳

以謀大體者必度材器而任之均休勞以避要途者

必贈名數以寵之所以啟其君臣禮義之至者也具

官某志尚沉靜才邵明敏博學窮邃古之遠精義達

萬微之奧進以儒術居然國器置於諫垣則有獻替

之論列於延閣則有顧問之辯嘗更外劇旋長臺憲

敷納惟允聞望彌著入叅宰席遂正樞庭幄中之謀

處而必申堂上之畫知無不爲屢陳懇悃之言固辭

宥密之重若乃總文昌之要增秘殿之職日與金華
之議兼涖天閑之政併是優寵所以示朕之眷賴而
彰爾之謙退其往踐之尚體茲意

孫沔可樞密副使制

朕惟上承宗社之大下撫人民之衆其出命令治紀
綱者惟一二輔弼之臣而已所以夙夜思慮敷求俊
賢引茲宥密之嚴專治兵戎之劇苟明不足以知王
體材不足以辦吾事者其可用之耶具官某以文業
進身而能果敢自任智略如車輻之奏論議若泉源

之流嘗居諫垣號爲鯁亮逮叅延閣屢更器使頃年

羗戎懷貳邊疆多故將漕關中有疏輔之術

鎮臨塞下

有威懷之稱斑旋于外夷惟曠一心近以峒獠肆狂

嶺服騷動寇勢莫遏民愁不聊特輟冀門之往當修

邕管之事果無策謀之勝仍親行陣之危天威一伸

兇醜大潰比旋師旅願謝官榮蓋寵故鄉之歸命治

全吳之重蔽自朕不忘懷貳樞庭擇材任官時議惟

允噫萬兵之衆在乎區處四夷之遠在乎撫定爾其

深惟眷賴益勵忠力交修不及輔成大務將朕有知

人之明而爾有濟時之美可不勉哉

解賓王男遵範試秘書省校書郎制

勅男某以爾父輟自計府將漕于外引援恩典推延子姓名試秘丘之秩用爲使者之寵益務修飭以對褒渥

王仁旭起復雲麾將軍制

勅三年之喪不從政所以明子道之本金革之事卒哭而不避所以著戎節之大故恩以伸愛義以奪情禮有從權蓋不獲已而爲之也具官某世風紹於前人武畧長於馭衆處方郡扞防之重屬邊圉總獲之雄屯萃肅齊埃郭嚴靖庵罹家禍求解兵麾念門內之治則必志難從遏塞下之虞則匪材弗克宐節棘樂之戚勉循墨衰之行苟忠尚之不忘亦孝誠之已著體茲眷賴往服訓言

蔡準可秘書丞知秀州嘉興縣制

勅具官某三歲一考吏治績狀有材廉之稱無失繆之舉者從而遷之所以勗勵來者以爾業文中科佐著作局歷官清白嘉有能最卽承舊省仍涖大邑勉

隆政迹以荷褒寵

吳幾復可大理寺丞依前國子監說書

庠序之設所以起風化而養賢材也其於訓導講說尤難其人故業官遷秩差異異常等以爾幾復善談經術甫更再歲薦任交上當夫陟典與名理官益寵優次勉懷儒尚用荷邦榮

張玉盧政並供備庫使制

具官某等自二廣平定以來完修城郭增繕器械屯宿兵防保障邊圉以爾等材武沉毅志尚驍果卽正使聯之重往涖軍鈴之政務存遠略以靖遐服寵渥之數宜勉成効

齊惲可大理寺詳斷官制

勅具官某國家興定百年事爲之制四方守吏一法爲治中都官寺刑書所聚持平處議當表天下爾以材資久被薦引叅試具獄咸中准程遷榮秘丘仍居理讞文同而比異令具而犯輕勉是審詳以副欽恤

張友賢可大理寺丞制

向繇銓選作掾京府周歲敕職議法平直薦任交上

比援遷格升名讞理之秩仍處屬曹之列益思勤盡
以荅甄獎

楊京可著作佐郎制

勅具官某邊陲互市之局不惟籠利以助資費蓋於
輕重務得其要爾居是官既亦三載收括餘羨第在
遷賞秘省清秩用爲勸勞愈虔乃心勉尚修立

選人授錄事參軍監茶場制

勅具官某等摘山之利歲資支計其數百萬然而涖
局者因循至有貨居而不行滯留月久有司請寬資
限博取材幹以辦其事銓選爾曹以塞朝旨進以州
掾之秩徃臨筦權之務勉尚廉敏賞豈吝哉

勾勉監課州商稅制

勅具官某以貲入官未更職任而能果勇自力捕除
寇盜比拔遷格宜被甄獎試僚京秩序次縣章仍臨
征筦之繁益樹廉能之最

于壽差勘臨朐縣令張師尹進狀冤枉于壽奏

案入閑詞譏訕朝政

具官某以明經中選治邑劾官承監司之符文鞠部

令之寃訴證逮在遠時月其延輒恣調詞編着具獄始攬奏牘嗟其易心及茲問狀之來彌見得情之實寘于法議宜在嚴科屏之仕途用懲猶妄尚念前王之德或恕狂夫之言止降宮撻之聯尚臨征筦之局體予寬大益自修省

楊愈可太子中允制

勅具官某吏繇銓筦而進者皆先以閱閱達于予聽慮夫一士周旋申覆然後處其進退便坐呼引視按材品乃決其事凡脫州縣之職登京師之列如是之難爾其日思茂恩益修業履

宗績等新婦一十三人並封郡縣君制

淑惠秉心柔明遵禮挺生華族嬪偶宗英益修婦道之嚴式表閨儀之重屬茲延慶舉于大宗特推疏邑之封用獎宜家之美勉終賢範茂對朝恩

孫奕知通利軍

澶州通判日割芟草四百萬轉運使乞酬獎與轉官

勅某官書曰德懋懋官功懋懋賞今之疇勞以官試與古異然有勞而遷於計歲月而例循資級者尚有勸焉以爾向爲監郡瀕於大河割聚棧薪餘四百萬

陞與郎位典刺軍壘

張唐民著作佐郎張暹龍大理寺丞制

勅具官某等凡職于州縣者去朝廷遠甚故責之上官以設保任之科關於銓筦以修功實之最審察能否而後遷焉者歲餘百人不爲不多然漸而器使益難其才以爾文藻溫瞻吏資敏明陞與京曹用勸能者益圖績效以稱予擇才之意

文恭祖可右贊善大夫

勅其官以爾父嘗秉政鈞出臨方面藉其才智往于

邊陲眷嗣子之克家叅京曹之著位寵陞儲案仍易

□章惟示隆恩用光慶閭材修業履益紹顯榮

紀德轉儀鸞使制

勅具官某向以夷獠弄兵邊圉被寇躬率士伍力當戰鋒雖剪逐於凶渠亦彫隕其嗣子眷言才勇宜被恩榮遷進使聯用醜功最勉圖來効母怠忠勤

授儀鸞使制

勅具官某選自材往監軍治練習邊疆之事通知士伍之情眷惟帥臣屢形奏牘任其幹辦許以精勤特

遷幄□之聯仍處兵戎之務勉圖忠効用荅寵靈

胡旦贈工部侍郎制

勅治道出於人文惟儒者為能通而行之故世主右賢以風天下國家發揮神化招揀樸茂挾經術揆詞章者脫巖野而都卿相生饗顯榮歿有祿贈可謂重矣具官某該貫百氏之言而藻思雄瞻首中科選旋升禁掖以材自名聲蓋人上秋逸之驥躑蹶申路以晚病退著書見世今聞嗣續彫落旅魂未安已敕守臣給辦喪事仍以文昌貳卿申賁泉壤嗟爾不泯其少

慰哉

錢師回授皇城副使制

勅具官某材幹敏劭智畧精明典符方州總兵江峽民俗安靖疆陲協寧逮茲還朝仍列禁省迹其功閔之最陟于城雉之聯益尚清修勉立來效

呂公弼充龍圖閣直學士知瀛州制

勅國家都汴而燕趙之郊制控北道河關尤為要地今雖邊圉晏清然於遠馭之策屯敢勇之士蓄犀利之器以為蔽扞委之儒將苟非智畧通敏燭見事機

曠可以任具官某出於相門挺然有立持身遠於權
利從政達於治經踐歷滋深風稱甚美頃以遣臨河
朔之重遂升延閣之華省徭以集流亡流粟以資支
計列城謹於備禦吏部悚於嚴明逮茲罷還聞嘗諮
訪遷河圖之近綴總帥幕於故關風俗所安兵民所賴
皆爾周悉豈煩訓言

吳育復資政殿學士知陝州制

勅近侍之臣嘗更二府以叅國論有補於時者朕每
念之不忘于心具官某文業深厚顯于當世才勩端
敏貳于幾政進謀獻道蔚爲巖廊之器宣仁流化屢
更屏翰之職向者甫畢家難俾處經筵庶乎諮詢日
聞讜議遽形剡奏願就宴閑遂兼麗正之名仍蒞憲
臺之重悉還舊秩分治要藩抑予爾思勿憚煩於事
任

姚吉甫知廣州清遠縣事制

勅具官某頃浚薦任分宰邑封爰滿歲成復從銓調
奉賓游於幕府宣上化於吾人勉治政經庶光朝寵
宋航監鄆州竹家渡制

勅具官某近監司具章以爾資材罷軟年力衰暮庾氏之職亦莫能集尚念服勞之久更臨濟涉之務益自奮勵無或空曠

李士隆授濟州任城尉與萬戶請受制

勅具官某尉能除盜時乃修官格有敘勞茲用推賞勿居近邑增昇奉泉勉圖敕職之勤益荷懋功之美

陳世京孫有孚石城並著作佐郎制

勅具官某蚤籍吏資遠宣邑治惟士風之尤異彌歲月以甚勤契傳銓程當正遷格宜與蘭臺之集用欽

繪漢之華益務悖修毋忝褒命

任中師外甥江景倫試監簿制

勅具官某以爾外舅嘗貳機衡休有善狀唯其子姓克荷家聲緝綴遺文薦于乙覽追思德舊恤及親聯列於工監之名表乃朝恩之渥

錢公紀大理寺丞充刑部檢法官制

勅具官某天下所以正明無失者共三尺法耳而秋官考讞尤爲四方所則其屬官非有敏明之資罔克勝任以爾文華中選廉著吏稱覆閱科典旣亦游歲

就遷京寺仍處舊治益敕厥職勿懈乃心

都宗范皇甫望並授大理寺丞制

勅具官某京司之官職任皆要與其名列必有材選
今雖兼授於外然銓管而進詳擇尤重以爾等或班
教條於縣道或正綱紀於郡部咸有勤稱中于遷格
往丞廷尉恩渥甚茂爾宜勸勵毋或少懈

明衮楊崧並授大理寺丞制

勅具官某出於儒族久贊賓等居多保任之文休有
闕潤之最吏資兼敏銓覈申程陟京寺以開榮眷朝

恩而甚茂勉修身檢益邠世風

田况可禮部侍郎充三司使制

勅郊廟之禮官師之稟內以贍萬旅外以通四夷經
入貨費歲鉅萬億予有近列試總大計推本儒術辦
益邦賦卽拜真命僉言茲允具官某文業華敏屢申
科選經詒精博蚤奉策對踐歷諫署規箴有直亮之
節延登詞禁策訓有深厚之體周旋清密卓爾端勁
懷綏藩圉蔚然材略向繇全蜀還司會府季予仁心
而圖可久之利用周國支用而削無名之歛迹其風稱

朕甚嘉焉遷正使名序進官秩屬委彌重汝無憚煩
李澄可內殿崇班制

勅具官某才兼武幹名列禁嚴按最要於攸司宜進
遷於厥秩往聯文陛特視通閨母替夙夜之勤以對
寵靈之茂

王利涉除率府副率

勅具官某列職禁墀護兵邊圉比因朝譴願謝仕途
尚軫哀遲久備驅使往貳官坊之率猶無秉奉之資
歸安汝躬厥恩甚茂

張塤守將作監主簿制

勅張奎孫某惟乃祖修身泄官清白恭良屢更寄委
勿憚勤勞奄爾淪亡念其子姓卽正舊秩往服恩茂
袁胄試將作監主簿昭州教授制

勅袁胄嚮有恩旨嶺裔之外歷訪遺材今爾守臣與
使本道者以爾伏膺典墳不求仕進願加寵命用勸
遐俗往試名於京秩乃闡教於州庠欽服甄掄益勵
誠節

宋蔡忠惠文集卷之十一終

能勿... 卷一



